

## 2 Pedro

---

### Porrosht chiihla daabo.

**1** <sup>1</sup>Yok Simón Pedro uje tichew ana hutita tokosim olak. Yok Jesucristo ir yilak hn ir apóstol. Jesucristo wichi uu eyok Porrosht uje ishi eyok hnitewihi dahirkite. Wichi uje ye duhu yotiis irpe, hn ye duhu otislo ire. Ye niyokörpe kinaha par olak hn kinaha par öryok. <sup>2</sup>Par uje ma erahalo Porrosht ir iluu hn ma erahalo eyok İrhîch Jesucristo ir iluu ich sehe shish tuu odosir olak hn ma oduhu olak aho kiis.

<sup>3</sup>Chîra dakirbo ich nos ishîm eyok uje eyok nesita par ese ikirît uje yelij nihna ire hn par uje yuhu eyok iluu itso ire. Shi pork yiraha ire uje chiihla eyok, heke ishîm eyok shuu itsorz. Wichi chiihla eyok par uje yuhu ire ma dich. <sup>4</sup>Shî pork yuhu ire ma dich ich chîbite lahwoso uje ich ihîrts pisho par uje olak pwele moymlo erze kuche mîhnûwo uje oso oshiyokörîhi nâhu îrmo. Oshiyokör kuche mîhnûwo pork otsahmûr. Ich uhurc nehe ich olak iluu om shî itso Porrosht ir iluu. <sup>5</sup>Porrosht tyenîj shiyokör itsorz par olak pork ye otislo ire heke enaha olak par uje ahakörlo om. Enaha olak toy par uje erahalo uje Porrosht ahwoso tata. <sup>6</sup>Hn enaha olak par uje ahakörlo uje Porrosht ahwoso tata hn ye ahakörlo kuche mîhnûwo. Enaha olak par uje nos olak ewenta erze kuche mîhnûwo uje tîr olak. Enaha olak toy par uje ahmûrlo Porrosht. <sup>7</sup>Enaha olak par uje ahmûrlo Porrosht aabo yewo, hn enaha olak par uje nos ahmûrlo oso yewo. <sup>8</sup>Kimîji ye ahakörlo erze uje titîm olakike ich ye olak jukur, per kimîji shish ahakörlo ich ahakörlo om pork erahalopa eyok İrhîch Jesucristo ir iluu. <sup>9</sup>Kimîji ye yeêk niyokör uje itsorz ich wichi shî itso uje olîbîk o kimîji ile pata, heke chikey uje Jesús perdonar erze kuche mîhnûwo uje shiyokörni. <sup>10</sup>Pishîbo watsaklo, par uje ye tokolîhi olak yeêk ilorz ich tyenîj ahakörlo itso uje titîm olakloko par uje uhulo îmeheeych uje ich ũru uje Porrosht chiihla olak. Kimîji ahakörlo uhulo itsorz ich ye eeshlo ahakörlo mîhnûwo uje ye Porrosht nahmûrpe. <sup>11</sup>Îmeheeych uje olak Porrosht aabo heke deeych yet nehe ich shî itso uje otsîtsêr pwert uhurra oshuu isahapa par uje amsahalo eheth etîrlo ese owich uje eyok İrhîch Jesucristo tyenîj tîbey Porrosht aabohochîs

nehe. Wichi shish tibey ör. Yelij nihna ire. Wichi uje ishi eyok hnitewihi Porrosht ahirkite.

<sup>12</sup>Heke sehe shish tuu olak eyucha uje yesh titim olak. Osdeyo uje entloni, hn ahakörlo hn erahalo uje erze ich üru. <sup>13</sup>Uje ehn yesh yok ikaha nāhu irmo ich tibite uje ma om tuu olak eyuchapo uje oshiyokorāha olak par uje ye ekeylo. <sup>14</sup>Tikiraha uje ich yej terihi pishirīt par uje tikiti heke tyenij oshuu yok oshuu tikiti shi itso uje eyok Irhīch Jesucristo tatim yokni. <sup>15</sup>Tichew ana hutita par uje titim olak erze pahwoso. Heke uje tikiti nehe ich shish erahalo ahnūwo pahwoso uje titim olakike.

<sup>16</sup>Erze uje tiyokorāha olak hn erze uje apóstole yewo oshiyokorāha olak oshuu erahalo uje eyok Irhīch Jesucristo ir ukurbo de, hn tyenij cheeshpo nehe. Erze ir ahwoso ye monihnepe uje shi otata. Ye shi öryok eyuwo tisīrpe hn oyitim olak. Wir ich üru. Yok hn erze apóstole yewo oyumoni uje Jesús hüre. <sup>17</sup>Oyunt Porrosht uje narim Jesús. Tata im: — Wichi uu yok pijit pisht. Tahmürpa uje shiyokör.— <sup>18</sup>Öryok oyunt erze ir ahwoso uje tāra poörc pork öryok dechi Cristo ahir kojach eeych uje ir Deych keytkēr. <sup>19</sup>Heke Porrosht shuu yakaha erze ahwoso uje profeta poruwo wishi otatkite. Tyenij ěrlo pahwoso uje titim olak. Erze profeta ör ahwoso shi itso nampyont uje hüre chihit ese owich uje ich dihlelpa nehech deychole hn porrzeebcha bahluta tokole shi itso uje chihit olak aho. Shi titeēta uje shuu erahalo kuche nehech Cristo cheeshpo nehe ich erahalopa. <sup>20</sup>Ahnūwo ahwoso uje tyenij titim olak ich tyenij erahalo. Nīhyok uje yeēk shuu deyuwo tisīr hn chichew Porrosht ahwoso shuu itsorz, <sup>21</sup>heke ich nīhyok profeta uje shi tata lahwosni. Shi otatni uje Porrosht Ichibich tatim ör uje Porrosht tata.

### Oso ode nehe uje ör prowa otsehnýer Porrosht aabo.

**2** <sup>1</sup>Titim olak uje oso odekite uje ochii ir profetihi ese israel oso ör hnimich per wir ye profetpe. Je deeych yet nehe hn oso ode uje otsanimirāha Porrosht ahwosoho olak ehēt per wir shi otata uje tāra ör eyuwo. Ör ahwoso shuu oso ochibite uje ye otīr urhuta bahluta ehēt nehe per ye ürpe. Ye oduhu deyuwo imeheeychpe uje oshiyokorāha olak nehech uhurc ich otsata eyok Irhīch Jesucristo uje ishi ör hnitewkite heke Porrosht tyenij sepyēr ör shīchish ich shuu dospa. <sup>2</sup>Ich okihniya uje ye olotiis ör petik nehe hn otseēt ör. Oshiyokör mihnikīhi timcher oshuu ör iluu itso ör. Heke oshuu oso yewo ochish majamichihī Porrosht ahwoso uje ich üru. <sup>3</sup>Wir shi otsahmūr hnote heke oshiyokorāha olak erze ahwoso uje ye ürpe par uje oshuu asimlo ör hnote. Osdeyo uje Porrosht chibite par uje sepyēr ör nehe hn tyenij yakaha.

<sup>4</sup>Porrosht ye perdonar erze anjele petikkite uje oshiyokör mihnūwo. Tāra ör chibite ör ese jotsit uje ich yakpa hn iim orīhichis asa dihlelta

ehet. Shi oyem uje sepyēr ōr nehe. <sup>5</sup>Hn itspo Porrosht ye perdonar erze oso petikkite uje ehn ode nāhu ĩrmo uje ehn Noé de. Shuu kresyent bahlut tĭrĕtkite par uje sihna erze oso uje ye onahmūr Porroshtpe. Noé nos tatim oso uje tyenij oshiyokōr uje Porrosht sahmūr, per ye onahmūrpe, heke Porrosht shĭ takashĭm ire hn erze ōr syete uje ōya ire, heke ye otope. <sup>6</sup>Hn itso erze oso uje odebuhu erze duwo Sodoma hn Gomorra, Porrosht sihna ōrkite hn sĕru erze ōr duwo nehech piĭtsak. Shiyokōr shuu itsorz kite par uje oso uje ye onahmūr Porrosht ochiraha uje Porrosht tyenij sepyēr ōr ich dospa. <sup>7</sup>Porrosht chiyuhu Lotĭhi ese dĭt Sodoma ehetskite uje oso ode uje ōr ĩлуу mĭhnū. Ese Lot ich ĩлуuta om per ich sitak wir ōr ĩлуу. Shish oshiyokōr uje mĭhnūwo heke ye duhu Lot lishi ehēt kĭispe. <sup>8</sup>Debuhu wir ōr ehēt hn kal deeych umo erze mĭhnūwo uje wir oshiyokōr hn chunt erze mĭhnūwo uje otata. Wir shuu ire dosdarak. <sup>9</sup>Heke ich imeheeych uje eyok ĩrhĭch chĭrahapa sosĭr erze uje otsahmūr ire par uje ye oniyokōr erze kuche mĭhnūwo uje yewo sehe oduhu Porrosht aabo oniyokōr. Hn chĭraha toy tĭbey erze uje oshiyokōr uje mĭhnūwo nehech terĭhi ishĭrĭt par sepyēr ōr. <sup>10</sup>Ese deeych uje Porrosht sepyēr ōr ich yarhakpa par erze uje shĭ omuhuye ahĭr par uje oshiyokōr mĭhnuwōhoye. Tyenij Porrosht sepyēr ōr ich shuu dospa. Erze oso ye otolpe erze ōr bahluwo. Ye otola latik. Ochinehnĭm erze uje ode poōrc uje ōr ukurbo deyo de hn ye otola ōrpe.

<sup>11</sup>Erze anjele ma ōr ukurbosh per ye oniyokōrpe oduhu ĩlorz. Yelĭj otatehe eyok ĩrhĭch ĩle ĩkĭch uje yewo ōr ĩлуу mĭhnū. <sup>12</sup>Erze hnakĭrbo oshiyokorāha olak nehe erze uje ye ũrpe. Otata lahwošo mĭhnūwo erze uje hnĭi ōr ire ye odĭrehepe. Oshiyokōr erze uje ich mĭhnūwo hn erze kuche mĭhnūwo tyenij cheeshĭ tĭr ōr hn sihna ōr. Wir shĭ ōr itso lošĭpo. Ye ōr eyuwĭrsh. Ye ōr eyuwo tĭsĭrpe uje oshiyokōr kuche. Wir shĭ ōr itso lošĭpo uje shŭrha shĭ par uje yeĕk pwele shiyeru hn shuu shuu toy. <sup>13</sup>Oshiyokōr mĭhnikĭhi yewo hn wir oshiyokōr mĭhnikĭhi ōrpo. Uje deeych ich otsahmūr pishi erze ōr ahmiyo uje oshiyokōr. Otĭrĕt otĭr olak ahamich toy per ich ye ompe pork wir ōr ĩлуу mĭhnū. Uje odechĭ ich shĭ itso mansha uje de ōr nerpta. Uje odechĭ olak ahamich owich ich ōr aylpa pork otsehnĭer olak oshuu ebĭtĭlo uje ich ōr ĩлуу om. <sup>14</sup>Otsahmŭrpa uje oteychĭm tĭmcher hn opota ōr shĭ par uje sehe otorāha ōr. Yelĭj patim ōr uje oshiyokōr oshuu itsorz. Otsehnĭer Porrosht aabo uje hnĭi ochĭraha Porrosht ahwošo oshuu oshiyokōr uje mĭhnūwo. Ich yakaha ōr uje opota kuche. Porrosht chĭbite lahwošo uje tyenij chĭmchaha ōr urhuta bahluta ehēt nehe. <sup>15</sup>Erze uje otsehnĭer ōr ich oym Porrosht ĩjĭch par uje oshiyokōr kĭnaha. Oshiyokōr itso uje uu profeta Balaam lishi shiyokōrkite. Ese Balaam wĭchĭ ĩr deyĭch ĩich otsĭi Beor. Balaam ich sahmūr pishi uje shiyokōr uje mĭhnūwo par uje serz hnote. <sup>16</sup>Porrosht shuu asa borkĭta chĭlehet keytkĕr Balaam uje shiyokōr uje mĭhnik, hn sontew ese profeta uje sehe niyokōr uje mĭhnik shĭ itso uje wĭchĭ totĭhla.

<sup>17</sup>Erze hnakirbo uje otsanimirāha ahwoso uje ye jukurpe wir shi ōr itso jotse uje ye awit chihi ehete. Shi ōr itso ukuhur uje shi myent hnoy par uje ye ibikpe. Porrosht chibite owich shi par ōr ire wahacha uut pisht uje ich dīhlepa. <sup>18</sup>Uje ōr ire ochiilehet ich otsihnew lahwoso par onarim ire per ye jukur. Wir otsehnyēr erze uje yesh omasaha par Porrosht aabo uje antni shish oshiyokōr erze kuche mīhnūwo shi itso oso yewo. Wir oshuu oshiyokōr erze mīhnūwo toy uje antni oshiyokōr. <sup>19</sup>Otatim ōr uje ye latikish uje oshiyokōr erze mīhnūwo per ye ūrpe. Erze kuche mīhnūwo ye duhu ōr librepe. Erze kuche mīhnūwo shi masaha itso ōr yinsiro pork ich yakaha ōr pork erze kuche mīhnūwo uje yakaha oso wir uu ōr yinsiro. <sup>20</sup>Uje ochiraha uje eyok Irhīch Jesucristo ishi ōr hnitewkite ich oym erze kuche mīhnūwo uje de ĩrmo. Kimiji odeeshpo oniyokōr erze mīhnūwo uje oymkite nehech uhurc ich yakaha ōr heke ich uhurc ich ōr ma iluu mīhnū. Ye ilo uje wap petikni. <sup>21</sup>Ma om kirēhe ye onunt uje tyenij shi ye olotiis Cristo par uje omasaha par Porrosht aabo je uje ochuntni hn oym ocheeshpo oshiyokōr erze mīhnūwo. <sup>22</sup>Shi ōr itso erze ahwoso uje ich ūru uje oso otata. Shi ōr itso pohoch uje pwey hn cheeshpo tew lapweych. Shi ōr itspo poohle uje ochūrhu hn cheeshpo tabitehe katuta.

### Eyok Irhīch tyenij cheeshpo nehe.

**3** <sup>1</sup>Pishibo watsaklo, tichew ana hutita yatapo. Ich otiyer uje tichew tokosim olak par uje uhu olak eyuwo tisīr. Sehe ye tuu olak koswāha, <sup>2</sup>hn sehe tuu olak eyucha uu Porrosht ir profeta poruwo wishi ōr ahwoso hn olak eyucha uu eyok Irhīch ir ahwoso toy uje erze apōstole yewo oshiyokorāha olak uje Jesucristo ishi eyok hnitewihī Porrosht ahirkite. <sup>3</sup>Wap sehe tuu erahalo uje deeych yet nehe uje yej terihi ĩrmo uhurc hn oso ode uje ochiyuhu lahwoso uje shi ōr ire otsahmūr par uje oloter yewo. Shi oshiyokōr erze mīhnūwo uje ōr ire otsahmūr. <sup>4</sup>Wir otata otsii: —¿Jesús chihi iraāpo? Chibite lahwoso uje tyenij cheeshpo per ye deeshpope. Nehech eyok deyo wishi otoni hn ye taāchpe nehech ele ahle. Uje ehn ĩrmo tenitkite nehech ele ahle shish itsye.— <sup>5</sup>Erze oso ye onahmūr odirehepe heke ochikey uje Porrosht chiilehetkite hn poōrc tokole hn ĩrmo de hn hnimich tokolihi awit uut hn shuu awit pīt tīr poōrc hn pīt sakaha hnimich. <sup>6</sup>Porrosht chīra ese awit shuu kresyent bahlut tīrēt par uje nos sihna oso uje ode nāhu irmōkite. <sup>7</sup>Porrosht chibite lahwoso par uje terihi ese deeych nehe ich shi chiilehet hn jwekita sihna poōrc hn sihna hnimich hn sepyēr erze oso uje ye onahmūr irpe hn chīmchaha ōr urhuta bahluta ehete.

<sup>8</sup>Pishibo watsaklo, ye ekeylo. Par eyok Irhīch uu deeych nohmet shi itso mil āyo hn mil āyo shi itso deeych nohmet. <sup>9</sup>Oso ode uje otata uje eyok Irhīch iyehi lahwoso pork ye niyokōr shichishpe uje ire tata, per eyoklo Irhīch yelij sehi lahwoso. Shi hneta oso pork ye nahmūr uje yeēk

tĩr urhuta bahluta eheth nehe. Shi sehe duhu nos őr eyuwo tisirĩhi Cristo uje ich ũru, ye onimehipe hn ye olotiis irpe. <sup>10</sup>Per ye latik diraha eyok ırhĩch ır ishırĩt shi itso echikit uje taachĩhi dıhlak hn ye latik diraha. Shi ich ihyokōrak dich uje ire sıhna poōrc chĩra jwekita hn erze kuche uje dechi hn sıhna hnımich toy. Nos wir kuche uje oso oshiyokōr nos sēru. <sup>11</sup>Ich ma om uje ahakōrlo uje Porrosht sahmūr hn eeychāhalo ire pork ire tyenij nos sıhna erze kuche shuu itsorz nehe. <sup>12</sup>Uje ehn anemlo ese deeych nehe ich ahakōrlo uje ire sahmūr par uje uhulo cheeshi shichish. Uje terihi ese ishırĩt ich Porrosht sıhna poōrc hn sıhna hnımich chĩra jwekita. <sup>13</sup>Porrosht chıbite lahwošo uje tyenij shiyokōr poōrc hn shiyokōr hnımich ahlo heke shi yiyemlo erze ahlo uje mĩhnik nihyokōhōchıs.

<sup>14</sup>Pishıbo watsaklo, uje ehn yesh anemlo ırmo ahle ich enahalo olak par uje ye ahakōrlo uje mĩhnũwo. Heke uje Cristo cheeshpo nehe ich nıhyok olak kuche mĩhnũwo, hn shi olak aho kiisihı ır ile ikich. <sup>15</sup>Ye ekeylo uje eyok ırhĩch yesh hneto oso par uje omasaha par ır aabo. Porrosht ishim eyok leshıbich Pablo eyuwoni hn shuu chichew lahwošo <sup>16</sup>uje tata itso uje tichew. Nos wir erze ır hute uje chichewni tata itso yok uje tiita uje Cristo cheeshpo nehe. ır ahwošo yewo de uje ich kwespa par uje ochıraha. Erze oso uje ye odıraha latik hn erze uje yerij odırahapa Porrosht ahwošo oshuu Pablo ır ahwošo poshik par uje oshiyokōr uje őr ire otsahmūr. Wir oshuu Porrosht ır ahwošo yewo poshik toy per uje oshiyokōr oshuu itsorz ich shi sehe oduhu Porrosht nihna őr ire nehe. <sup>17</sup>Pishıbo watsaklo, uje ehn ye wir otaācha ich titim olak wap par uje erahalo. Abeylshıp olak par uje ye onehnyēr olak hn oduhu olak koswāha. Wir őr iluu mĩhnũ. <sup>18</sup>Ma om uje erahalo ma eyoklo ırhĩch Jesucristo par uje ma takashım olak. Wichi uje ishi eyok hnitewihi Porrosht ahırkite. Ele deeych ich sehe tuu nos oso onahmūr uje Porrosht wichi uu őr bahlut pisht hn shish itsorz. Ich ihırtpa kimiji oniyokōr oduhu ilorz.